

四庫全書

經部

欽定四庫全書

經部

毛詩講義卷五

詳校官監察御史臣邱庭澍

通政使司副使臣莫瞻菴覆勘

謄錄貢生臣吳士英

欽定四庫全書

毛詩講義卷五

宋 林岳 撰

小雅

呦呦鹿鳴食野之苹我有嘉賓鼓瑟吹笙吹笙鼓簧承
筐是將人之好我示我周行呦呦鹿鳴食野之蒿我
有嘉賓德音孔昭視民不忮君子是則是倣我有旨酒
嘉賓式燕以敖呦呦鹿鳴食野之芩我有嘉賓鼓瑟
鼓琴鼓瑟鼓琴和樂且湛我有旨酒以燕樂嘉賓之心

呦呦然鳴鹿相呼食野之苹草猶君有酒食召其臣
下行燕享之禮致其羣臣而曰我有嘉賓親且敬之
也鼓其瑟而吹其笙以樂之吹笙之時鼓其笙中之
簧又奉筐篚承幣帛以將之蓋以羣臣之愛我故我
以此恩義示之列位也蒿可啖德音孔昭旅酬之時
所語先王道德之音甚明以此示民民皆象之不偷
薄於禮義而君子亦於是法則倣倣之嘉賓之賢如
是故我有美酒用之與燕飲以遨遊也視古示字同

琴牛馬喜食之鼓瑟鼓琴和樂而且湛久以燕樂嘉
賓之心樂其心則人斯盡其心焉詩中初無求報之
意而序者推理之必然鹿鳴天子燕羣臣之詩儀禮
諸侯燕禮卿大夫鄉飲酒禮皆得笙歌小雅故魯穆
叔拜晉君工歌鹿鳴之三則曰鹿鳴君所以嘉寡君
也文王天子朝廷諷誦之雅而穆叔不拜晉君之歌
是矣乃亦曰文王兩君相見之樂也不知太師許諸
國得歌此耶抑諸侯之自僭耶當考

四牡駢駢周道倭遲豈不懷歸王事靡盬我心傷悲
四牡駢駢嘽嘽駘馬豈不懷歸王事靡盬不遑啟處
翩翩者騅載飛載下集于苞杞王事靡盬不遑將父
翩翩者騅載飛載止集于苞杞王事靡盬不遑將母
駕彼四駱載驟駸駸豈不懷歸是用作歌將母來諗
言四牡之駢駢然行不止在周道而歷遠普天之下
皆周道非必岐周也豈不懷歸王事無不當堅固者
其心則傷悲矣懷歸私靡盬公傷悲情思也駘馬勞

而喘息遑暇也啓跪處居也古者臣受君命舍幣于
禰乃行雛夫不鳥也夫字一為鳩不方浮反又如字
又為鴝同一名浮鳩翩翩飛下集于桐木枸櫞之間
王事無不當堅固也爾臣則不遑將母矣駸駸驟也
爾臣豈不懷歸乎終日思歸而此日歸矣我用是為
此歌以勞之將母之情其來諗告於君也毛氏曰父
兼尊親之道鄭氏曰人之思常思親者再言將母亦
其情也

皇皇者華于彼原隰駢征夫每懷靡及 我馬維駒
六轡如濡載馳載驅周爰咨諏 我馬維駒六轡如緇
載馳載驅周爰咨謀 我馬維駟六轡沃若載馳載驅
周爰咨度 我馬維駒六轡既均載馳載驅周爰咨詢
常棣之華鄂不韡韡凡今之人莫如兄弟 死喪之威
兄弟孔懷原隰裒矣兄弟求矣 脊今在原兄弟急難
每有良朋況也永歎 兄弟閱于牆外禦其務每有良
朋烝也無戎 喪亂既平既安且寧雖有兄弟不如友

生 儉爾籩豆飲酒之飫兄弟既具和樂且孺 妻子
好合如鼓瑟琴兄弟既翕和樂且湛 宜爾室家樂爾
妻帑是究是圖亶其然乎

按以上二篇永樂大典缺卷

伐木丁丁鳥鳴嚶嚶出自幽谷遷于喬木嚶其鳴矣求
其友聲相彼鳥矣猶求友聲矧伊人矣不求友生神之
聽之終和且平 伐木許許醺酒有藇既有肥羜以速
諸父寧適不來微我弗顧於粢酒埽陳饋八簋既有肥
牡以速諸舅寧適不來微我有咎 伐木于阪醺酒有

衍籩豆有踐兄弟無遠民之失德乾餱以愆有酒湑我
無酒酤我坎坎鼓我蹲蹲舞我迨我暇矣飲此湑矣

丁丁然伐木之聲鳥鳴嚶嚶而驚懼出深邇高求其
友聲而從之可以人而不如乎心誠求之神若聽之
終得如志而和平矣許許聲也伐木義見上章二章
三章引下文耳以筐曰醢以藪曰湑謂以筐盪酒也
與美貌有酒有殄醴饌之豐可不睦族乎天子尊同
姓諸侯諸侯尊同姓大夫皆曰父異姓則曰舅國君

友其親賢大夫友其宗族朋舊通曰舅父寧適召之而彼自不來無使謂我不顧念之也於美也粢鮮明天子八簋粢然已灑擯矣陳其黍稷矣謂為食禮咎過也衍美貌籩豆陳列兄弟父母之黨亦朋友同儕者民尚以乾饌之食獲愆過于人况天子之饌反可以致恨于兄弟乎不當遠之也湑菑之也菑所六反縮酒也以茅泝之去其糟也酤一宿酒舉此以見朋舊相求之恩義也有酒則泝菑之無酒則一宿而成

之不計其有無也為我擊鼓坎坎然為我興舞蹲蹲
然及我今之閑暇共飲此滑相樂矣

天保定爾亦孔之固俾爾單厚何福不除俾爾多益以
莫不庶 天保定爾俾爾戩穀罄無不宜受天百祿降
爾遐福維日不足 天保定爾以莫不興如山如阜如
岡如陵如川之方至以莫不增 吉蠲為饌是用孝享
禴祠烝嘗于公先王君曰卜爾萬壽無疆 神之弔矣
詒爾多福民之質矣日用飲食羣黎百姓徧為爾德

如月之恒如日之升如南山之壽不騫不崩如松柏之茂無不爾或承

臣之祝其君曰天保定爾亦孔之堅俾爾信厚何福不開俾爾多益以無不庶又曰天保定爾俾爾福祿盡無不宜受天百祿降爾遠福汲汲然日且不足也則又曰天保定爾以莫不興如山如大陸如岡如大阜委積高大也如水縱長莫不多也則又曰君之祭也吉善蠲潔以為酒食是用享獻表其孝心春祠夏

禴秋嘗冬烝于先公后稷至諸蟄于先王自大王至
文王以下尸嘏主人傳神之辭謂先君曰卜爾萬壽
無有疆界矣此蓋言福祿壽三者之備而天相之祖
宗亦相之也則又曰神之至矣遺爾多福民之質矣
質實無偽日用飲食而已羣黎民也百姓百官族姓
也徧為吾君之德則而象之此則民從之也則又祝
之曰如月之上弦而就盈也如日之始出而就明也
如南山之壽不虧也如松柏之枝葉常茂盛青青相

承無衰落也

采薇采薇薇亦作止曰歸曰歸歲亦莫止靡室靡家玁狁之故不遑啓居玁狁之故采薇采薇薇亦柔止曰歸曰歸心亦憂止憂心烈烈載飢載渴我戍未定靡使歸聘采薇薇薇薇亦剛止曰歸曰歸歲亦陽止王事靡盬不遑啓處憂心孔疚我行不來彼爾維何維常

之華彼路斯何君子之車戎車旣駕四牡業業豈敢定居一月三捷駕彼四牡四牡騤騤君子所依小人所

腓四牡翼翼象弭魚服豈不日戒獫狁孔棘 昔我往

矣楊柳依依今我來思雨雪霏霏行道遲遲載渴載飢

我心傷悲莫知我哀

按此篇永樂大典缺卷

我出我車于彼牧矣自天子所謂我來矣召彼僕夫謂

之載矣王事多難維其棘矣 我出我車于彼郊矣設

此旆矣建彼旄矣彼旃旐斯胡不旆旆憂心悄悄僕夫

况瘁 王命南仲往城于方出車彭彭旂旐央央天子

命我城彼朔方赫赫南仲玁狁于襄 昔我往矣黍稷

方華今我來思雨雪載塗王事多難不遑啓居豈不懷
歸畏此簡書 嘒嘒草蟲趯趯阜螽未見君子憂心忡
忡既見君子我心則降赫赫南仲薄伐西戎 春日遲
遲卉木萋萋倉庚喈喈采芣祁祁執訊獲醜薄言還歸
赫赫南仲玁狁于夷

此勞歸將而一章二章述始行之言若曰我出我車
就馬於牧地自天子所命我來矣召彼僕御之夫使
之裝載而往矣王事多難維其急矣我出我車于彼

遠郊之牧地設旄者屬之于旄而建之彼鳥隼之
旟與龜蛇之旐胡不旆旆乎旆旆旒旒將帥既受
命而憂僕夫茲益憔悴憂其馬之不正詩人述其言
而美其勞三章則又斷之曰昔日文王之命南仲往
城朔方出車彭彭其四馬交龍之旂央央而鮮明南
仲承西伯之命以西伯承商天子之命我城彼朔方
也赫赫乎南仲哉獫狁之難於此而除今吾將率之
勞亦如此也四章述既歸之言曰昔我往矣泰稷方

華令我來思雨雪凍釋王事多難不遑啓處豈不懷
歸畏此簡書簡書戒命也國有急則簡書相告犇命
救之五章述旣歸之情曰草蟲鳴阜螽躍而從之天
性也未見君子則心憂旣見君子則心降此則國人
屬目室家望歸之喻也則又斷之曰赫赫南仲薄伐
西戎如此也六章述旣歸之功曰春日遲遲卉木萋
萋倉庚喈喈采繁祁祁之時而將士之歸執其當訊
問者獲其醜衆者薄言還歸則又斷之曰赫赫南仲

猘狁于夷夷平也

有杕之杜有睆其實王事靡盬繼嗣我日月陽止女
心傷止征夫遑止 有杕之杜其葉萋萋王事靡盬我
心傷悲卉木萋止女心悲止征夫歸止 陟彼北山言
采其杞王事靡盬憂我父母檀車幘幘四牡瘡瘡征夫
不遠 匪載匪來憂心孔疚期逝不至而多為恤卜筮
偕止會言近止征夫邇止

杕杜猶得蕃滋役夫勞苦不得盡其天性王事無不

堅固我之行役繼嗣其日十月為陽歲將改矣婦人
思念其君子則憂傷矣征夫庶其遑暇而歸止我心
傷悲謂戍役之悲也女心悲止室家之悲也升北山
而采杞托有事以望君子君子之勤於王事憂我父
母役車憚憚而敝四牡瘡瘡而罷征夫之歸其不遠
乎匪見其裝載匪見其來歸室家之心憂而甚病以
期望之往而不至多為憂也卜之筮之會人占之合
言於繇為近征夫之來當甚邇矣此序其男女之情

也

魚麗于罍鱮魚君子有酒旨且多 魚麗于罍魴鰈君

子有酒多且旨 魚麗于罍鱣鯉君子有酒旨且有

物其多矣維其嘉矣 物其旨矣維其偕矣 物其有

矣維其時矣

麗淫也罍曲梁也寡婦之笱也鱮揚也魴鮐也鰈鮒

也鰣鮓也君子有酒旨絕句酒旨而魚且多也物則

不止魚酒之謂多又嘉善旨又偕齊美又得其時可

樂也

南陔

白華

華黍

按逸詩三篇永樂大典無林氏說

南有嘉魚烝然罩罩君子有酒嘉賓式燕以樂 南有
嘉魚烝然汕汕君子有酒嘉賓式燕以衍 南有樛木
甘瓠累之君子有酒嘉賓式燕綏之 翩翩者騅然然
來思君子有酒嘉賓式燕又思

南有嘉魚江漢之間魚大而衆烝久也久如而以簠
罩罩之喻人君之思遲賢者也君之有酒得賢者以
為嘉賓式燕以樂未得而遲其來既得而同其樂此
樂與之誠也久如而以薄汕汕之亦喻也衍樂也南
方有樛然下垂之木甘瓠之草得上而纍蔓之喻君
子之下下賢者得往而歸就之君之有酒其於嘉賓
式燕而安之燕禮司正洗觶南面奠于中庭升東楹
之東受命西階上北面命卿大夫君曰以我安卿大

夫皆對曰諾敢不安夫不之鳥憇謹一意於其所宿
之木久如欲來翩翩飛集喻賢者之翔而後集也君
之有酒其於嘉賓用燕而又燕親之也思語辭大抵
君臣之間惟有一誠以相感天下之賢所以樂為朝
廷邦國用者以上之人有至誠親待之意其所謂賢
者美政美俗正身正君若詩書所載諸臣之言德不
離口道不離身非此等人孰與共治乎

南山有臺北山有萊樂只君子邦家之基樂只君子萬

壽無期 南山有桑北山有楊樂只君子邦家之光樂
只君子萬壽無疆 南山有杞北山有李樂只君子民
之父母樂只君子德音不已 南山有栲北山有杻樂
只君子遐不作壽樂只君子德音是茂 南山有枸北
山有楸樂只君子遐不作耆樂只君子保艾爾後

臺夫須萊草也山本高矣以草木之盛而愈積其高
喻賢者之有益於邦家也故詩人發明王者樂得賢
人之意一章曰樂只君子邦家之基言其功也樂只

君子萬壽無期欲其久存于斯世也桑楊杞李栲栢
栲栢皆言草木可以增山之高大也栲山栲也栲栢
也栲栢栲栢鼠梓也眉壽黃耆德音保艾皆欲其壽
而安安而久而昌也賢之生世如周太公衛武公
耆龐壽考如伊尹周公皆至耄老成其功業而尼父
七十有三天畀斯文皆參天地之數此詩人所以寫
樂賢之意而以久存者申言之不足爾

由庚

崇丘

由儀

按逸詩三篇永樂大典無林氏說

蓼彼蕭斯零露漙漙兮既見君子我心寫兮燕笑語兮是
以有譽處兮 蓼彼蕭斯零露瀼瀼既見君子為龍為
光其德不爽壽考不忘 蓼彼蕭斯零露泥泥既見君
子孔燕豈弟宜兄宜弟令德壽豈 蓼彼蕭斯零露濃
濃既見君子儔革沖沖和鸞雝雝萬福攸同

蕭蒿也漙漙然蕭上露貌蓼然長大者蕭斯蕭香物

之微者天不以其微而不潤也天之零露潤蕭而蓼
亦猶諸侯之既見吾君我心輸寫天子與之燕飲而
載笑載語是以稱揚德美使聲譽常處天子凜凜蕃
貌為寵為光言恩澤被及已也不爽不差也壽考不
忘祝其君之好德壽考也泥泥沾濡也孔甚燕安豈
弟樂易也宜兄宜弟如書兄弟方來之意令德壽豈
亦祝其君之好德壽豈也濃濃厚貌既見君子當有
車馬之賜轡首以皮革為之沖沖垂飾在軾曰和在

鑣曰鸞取其聲也乘其賜車言反于國萬福攸同之
頌歸之君而不敢專之已也

湛湛露斯匪陽不晞厭厭夜飲不醉無歸 湛湛露斯
在彼豐草厭厭夜飲在宗載考 湛湛露斯在彼杞棘
顯允君子莫不令德 其桐其椅其實離離豈弟君子
莫不令儀

湛湛在物上者露也物得露柯葉低垂非見日之陽
不得乾而舒放露以潤陽以晞皆物所資匪陽未遽晞

欲陽也匪醉未遽歸欲醉也王親諸侯同姓異姓皆
欲夜飲至醉湛湛露斯在彼豐草則亦匪日不晞矣
言澤草也厭厭之飲在宗人則考而成異姓遜之則
止也在彼杞棘則亦匪日不晞矣又言澤木也顯明
允信之諸侯醉酒飽德莫不令善是承君之歡不失
其德也其桐其椅其實離離而垂則又喻乎樂易諸
侯醉酒飽德莫不令善其威儀協陟夏之節如此二
木之榮實是謂上盡其觀下肅其儀也

彤弓弭兮受言藏之我有嘉賓中心貺之鐘鼓既設一朝饗之彤弓弭兮受言載之我有嘉賓中心喜之鐘鼓既設一朝右之彤弓弭兮受言橐之我有嘉賓中心好之鐘鼓既設一朝醕之

朱弓以講德習射者弭弛貌爾雅以言為我天子之嘉賞諸侯以弭弛之朱弓錫之俾之受而藏之不惟錫之以弓而又饗之以禮我於諸侯待以嘉賓中心誠欲貺與之鐘鼓既設一朝而大飲之載載以歸也

喜樂之右勸之橐韜也好說之疇報之左氏所載晉侯朝王王饗醴命之宥然後有形弓之錫詩所述先言貺以彤弓然後言一朝饗疇之樂鄭以為既錫而饗孔以為未必設醴要之錫必有饗詩以彤弓命篇故先言錫後言饗也

菁菁者莪在彼中阿既見君子樂且有儀菁菁者莪在彼中沚既見君子我心則喜菁菁者莪在彼中陵既見君子錫我百朋汎汎楊舟載沉載浮既見君子

我心則休

菁菁然蘿蒿之盛在彼大陵之中君子能長育人材
如阿之長莪菁菁然既見君子樂而且有威儀也中
沚沚中也我心則喜喜亦樂也中陵陵中也古者貨
貝五貝為朋錫我百朋言得祿之多也楊木為舟汎
汎于水載則也言舟者以沉浮言車者以軒輕舟之
在水則沉則浮容與之意也既見君子我心則休休
然也皆天下喜樂其君之詞也所謂君子之樂育何

以見之喻之陵汴有阿之盛喻之楊舟容與之意述
其百朋與其接見無非君之樂育也大抵詩人寓深
長之思序者推感召之自古者人君周旋于學之時
甚多此其學中之歌乎

六月棲棲戎車既飭四牡騤騤載是常服玁狁孔熾我
是用急王于出征以匡王國 比物四驪閑之維則維
此六月旣成我服我服旣成于三十里王于出征以佐
天子 四牡修廣其大有顙薄伐玁狁以奏膚公有嚴

有翼共武之服共武之服以定王國 獫狁匪茹整居
焦獲侵鎬及方至于涇陽織文鳥章白旆央央元戎十
乘以先啓行 戎車旣安如輕如軒四牡旣佖旣佖且
閑薄伐獫狁至于大原文武吉甫萬邦為憲 吉甫燕
喜旣多受祉來歸自鎬我行永久飲御諸友包鼈膾鯉
侯誰在矣張仲孝友

六月棲棲而簡閱戎車旣飭正矣四牡騤騤然載是
戎事之常服常弁服也獫狁孔盛我是用急盛夏出

兵耳王曰出征者以正王國之封畿使不為夷狄所
侵耳比物者毛物之齊也舉四驪而言一乘皆驪無
雜色則其它之盛可知又且閑習之而中于法則用
兵之法將與士閑習士與兵刃車馬皆宜閑習然後
擊刺射御無不宜矣維此六月之時旣成我戎服又
戒之曰師行當三十里可以舍息王曰出征以佐天
子此宣王之意而吉甫誦之詩人又從而詠之也四
牡修長而廣大而有顒顒顒之謂也薄伐玁狁以

奏大功有威嚴有翼敬共武之事以安王國獫狁可謂不自茹度乃自整齊來歸焦獲接于周地鎬也方也皆北方地名至于涇水之北徽幟有文鳥隼以為衣章將帥以下衣皆着焉毛云錯革鳥為章也白旆繼旒者央央鮮明元戎大車先前啓突敵陣之前行毛云夏鉤車先正殷寅車先疾周元戎先良鄭云鉤輦行曲直有正也寅進也戎車旣安從後視之如輕從前視之如軒然後調遣四牡壯健且閑矣薄伐獫狁

狁至于大原逐出之而已有文有武尹吉甫時為大
將其文武之德萬邦于是為法所以薄伐而獫狁遁
也吉甫之歸則宴安而喜樂矣天子勞之既多受其
福祉謂飲食賞賜之類來歸自鎬我行永久此勞歸
之辭也王命之飲且進其諸友恩舊者侍之又加其
珍美之饌如魚鼈膾鯉所以極勸之也善父母為孝
善兄弟為友毛云侯維也張仲賢臣也使文武之臣
征伐與孝友之臣處內嗚呼宣王所以中興也

薄言采芑于彼新田于此畱畝方叔涖止其車三千師
干之試方叔率止乘其四騏四騏翼翼路車有奭簟茀
魚服鉤膺鞶革薄言采芑于彼新田于此中鄉方叔
涖止其車三千旂旐央央方叔率止約軼錯衡八鸞愴
愴服其命服朱芾斯皇有瑳葱珩歟彼飛隼其飛戾
天亦集爰止方叔涖止其車三千師干之試方叔率止
鉦人伐鼓陳師鞠旅顯允方叔伐鼓淵淵振旅闐闐
蠢爾蠻荆大邦爲讎方叔元老克壯其猶方叔率止執

涖也車旂之盛方叔所率也長轂朱約錯衡以文四馬八鸞服三命葱珩服而芾色黃朱此皆為卿之車服也三章則變文以言教戰之事矣民於農隙閑習武事如隼之飛如隼之集亦我方叔涖之率之鉦以靜鼓以動五百人之旅鞠而告之五旅之師陳而列之顯允哉方叔乎出曰治兵則陳師而鞠旅也入曰振旅則又伐鼓而淵淵也進止動靜出入惟其所驅可謂閑于教矣四章言荊州之蠻敢讎大邦方叔元

老克壯其猶率其旣教之兵執虜以問訊大獲其醜
衆其民則前日之民故率之而功成其車則前日之
車故驅之而威振顯允哉方叔乎嘗與吉甫伐玁狁
而亦用此矣不待戰而蠻荆自來服我威光也詩主
咏征伐乃先言平時寓兵于農寓將于卿農隙教戰
兵習于將之意古人用兵不苟如此故有不戰我戰
則克伐玁狁是也有不必戰動之斯來則威蠻荆是
也制度存于聲歌之表妙矣芑白苗田二歲曰新一

歲曰留師衆于扞試習路大鄉所也交龍為旂龜蛇
為旐五官之長出於諸侯曰天子之老

我車既攻我馬既同四牡龐龐駕言徂東 田車既好

四牡孔阜東有甫草駕言行狩 之子于苗選徒翼翼

建旐設旐搏獸于敖 駕彼四牡四牡奕奕赤芾金舄

會同有繹 決拾既佺弓矢既調射夫既同助我舉柴

四黃既駕兩驂不猗不失其馳舍矢如破 蕭蕭馬鳴

悠悠旆旌徒御不驚大庖不盈 之子于征有聞無聲

允矣君子展也大成

一章言我車旣攻堅矣我馬旣齊同矣宗廟齊豪尚
純也戎事齊力尚強也田獵齊足尚疾也四牡龐龐
而充實乃駕言徂往洛邑以會諸侯焉總名洛邑有
王城有成周二章言田獵之車則既好矣四牡又阜
大矣是先因田獵而見其車之選也東都有大草之
地駕言將行田狩之禮乎春蒐夏苗秋獮冬狩總而
名之曰狩云鄭有圃田三章言之子有司也夏獵曰

苗有司于苗選其徒御厥聲囂囂惟選車徒有聲則
其它靜可知是先因田獵而見其徒之選也建我龜
蛇之旐又設旄于竿首其將為搏獸于教之備乎教
鄭地近滎陽夫必選其車徒建其旗物駕言行狩搏
獸于教是先具也孔以為駕言搏獸皆致意之辭未
實行也所說田車既好選徒囂囂皆先時田獵選擇
之事四章乃言會同矣其會諸侯于東都也諸侯之
來駕彼四牡奕奕然壯盛赤色蔽膝之帶黃朱色之

達屨或時見曰會或殷見曰同繹繹而陳也五章乃
言射矣鉤弦之決遂弦之拾旣已攸利而相比弓之
强弱又與矢之輕重相得射夫旣同而射又同而復
位雖不中者必助中者舉積禽也六章則言御之良
而射之習矣射而兼御是田獵之射也四黃齊色旣
駕矣兩驂從服不偏倚御者得舒疾之中不失其驅
馳之範射者舍矢則中如破物也七章言射獵之餘
整暇之意矣蕭蕭馬鳴悠悠旆旌毛云不譴譁也不

驚驚也不盈盈也反其言美之也徒御以警肅為尚
大庖以射獲為功乾豆賓客充君庖焉八章則總言
此行其征往會同田獵也有善聞而無諠譁之聲信
矣君子誠哉復古之大功也毛云田者大艾草以為
防或舍其中褐纏旃以為門裘纏質以為櫛間容握
驅而入擊則不得入左者之左右者之右然後焚而
射焉天子發然後諸侯發諸侯發然後大夫士發天
子發抗大綏諸侯發抗小綏獻禽于其下故戰不出

頃田不出防不逐奔走古之道也毛云一曰乾豆二
曰賓客三曰充君之庖故自左髀射之達于右髀為
上殺射右耳本次之射左髀達于右髀為下殺面傷
不獻踐毛不獻不成禽不獻禽雖多擇取三十焉其
餘以與大夫士以習射于澤宮田雖得禽射不中不
得取禽田雖不得禽射中則得取禽古者以辭遜取
不以勇力取鄭云射右耳本射當為達三十者每禽
三十也車一乘甲士三人之外步卒七十二人及其

它皆徒也徒御不驚毛所謂徒輦者蓋取釋訓云徒御不驚輦者也爾雅特釋此文故依而為說地官鄉師云大軍旅會同治其輦注云輦人輓行所以載任器也止以為蕃營司馬法輦有一斧一斤一鑿一裡周輦加二板二築夏后氏二十人而輦殷十八人而輦周十五人而輦是會田獵人輓輦以徒行也徒既為輦者故御為御馬者

吉日維戊既伯既禱田車既好四牡孔阜升彼大阜從

其羣醜 吉日庚午旣差我馬獸之所同麀鹿麀麀漆
沮之從天子之所 瞻彼中原其祁孔有儺儺俟俟或
羣或友悉率左右以燕天子 旣張我弓旣挾我矢發
彼小殍殪此大兕以御賓客且以酌醴

戊剛日乘牡以順其類重物謹微將用馬力先禱馬
祖且禱求馬之強健而有獲也田車則好矣四牡孔
盛大矣車牢馬健升彼大阜歷險而從禽獸之羣衆
庚午亦剛日外事以之辰午為馬又差我馬謹也獸

之所聚鹿牝曰麀牡曰麇麇牡曰麇牝曰麇麇麇衆
多也從漆水沮水驅禽而致天子之所瞻彼中原之
野獸則其大孔有矣鄭云祁作麇麇麇牝也牡曰麇
趨則儻儻行則俟俟三而曰羣二而曰友田者以驅
逆之車驅而至于彼防虞人乃重驅之順其左右之
宜以安待天子之射禽必左右射之使見羣臣之奉
上也自此以下乃言獲獸供王賓燕之事張弓挾矢
發彼小豝殪此大兕言中微而制大俱難能也豕牝

曰祀殪一發而死也以御賓客給御諸侯給與充用之謂也酌而醴羣臣以為俎實若乾為脯漬為醢則在籩豆是奉上之實也毛云饗醴天子之飲酒醴不可專飲天子於羣臣不徒設醴左氏天子饗諸侯每云饗醴命之宥毛傳云校人春祭馬祖夏先牧秋馬社冬馬步注馬祖天駟先牧始養馬者馬社始乘馬者馬步神為災害馬者四時常祭此其特祭伯長也天駟房也龍為天馬房四星謂之天駟房亦為龍馬

鴻鴈于飛肅肅其羽之子于征劬勞于野爰及矜人哀
此鰥寡 鴻鴈于飛集于中澤之子于垣百堵皆作雖
則劬勞其究安宅 鴻鴈于飛哀鳴嗷嗷維此哲人謂
我劬勞維彼愚人謂我宣驕

鴻鴈于飛肅肅其羽大鴻小鴈肅肅羽聲喻民也之
子于征勞來之劬勞于野者蓋及可矜憐之人而哀
此鰥寡也鴻鴈于飛集于中澤喻民有安定之意之
子于垣者勸民築室家為垣牆百堵皆興一丈為板

五板為堵雖則劬勞其究安宅此勸勞之辭也鴻鴈
于飛哀鳴嗃嗃喻民之言達于上也其言若曰維此
哲人所謂我者皆劬勞田宅一勤永逸之事維彼愚
人所謂我者皆宣示驕奢之事耳

夜如何其夜未央庭燎之光君子至止鸞聲將將
夜如何其夜未央庭燎晰晰君子至止鸞聲噦噦
夜如何其夜未央庭燎有輝君子至止言觀其旂
何其夜鄉晨庭燎有輝君子至止言觀其旂

宣王問夜之早晚夜未央未渠央也庭燎大燭有光

矣諸侯之早來朝則聞其鸞鑣之聲將將然未艾未
久也晰晰明也噦噦徐行有節也上章聞鸞聲爾今
向明我見其旂朝禮別色始入

沔彼流水朝宗于海歟彼飛隼載飛載止嗟我兄弟邦人
諸友莫肯念亂誰無父母 沔彼流水具流湯湯歟彼飛
隼載飛載揚念彼不蹟載起載行心之憂矣不可弭忘 歟
彼飛隼率彼中陵民之訛言寧莫之懲我友敬矣讒言其興
沔彼流水則朝宗于海矣諸侯春見天子曰朝夏見

曰宗馭彼飛隼則且飛而且止矣為人臣止于敬豈
無敬止之心也嗟我兄弟同姓之臣邦人諸侯莫肯
念亂亡而至京師者諸侯之父母其誰無父母之心
乎洒彼流水其流湯湯無所入矣載飛載揚莫知止
矣念彼不循蹟道或起或行幾於驕恣非盡諸侯之
過也此詩人所以憂之于心不可弭忘也弭止也馭
彼飛隼則有時乎率彼中陵是其常也喻諸侯之守
職順法度者亦是其常也民之訛言寧莫之懲乎人

或怨汝詈汝請張為幻則皇自敬德周公之訓也我
諸侯知敬王矣讒言其猶興乎信讒而疎諸侯益非
治世之事也其與韓奕嵩高異矣詩人安得不規之
鶴鳴于九臯聲聞于野魚潛在淵或在于渚樂彼之園
爰有樹檀其下維蘄他山之石可以為錯 鶴鳴于九
臯聲聞于天魚在于渚或潛在淵樂彼之園爰有樹檀
其下維穀他山之石可以攻玉

鶴鳴于九臯聲聞于野則身隱而名著矣魚潛在淵

小魚在渚也何樂于彼園之觀乎以其上有植檀而
下其擇也它山之石可為錯以琢玉聞于天高遠也
魚寒則去渚而逃淵穀惡木喻尚賢者而下小人也
祈父予王之爪牙胡轉予于恤靡所止居 祈父予王
之爪士胡轉予于恤靡所底止 祈父亶不聰胡轉予
于恤有母之尸穡

書曰祈父薄違蓋職掌封祈之甲兵我乃王之爪牙
也胡轉予于憂恤而使靡所止居乎宣王之時王師

嘗與姜戎戰于千畝而敗六軍之士出自六鄉法不
取于王之爪牙爪牙之士為王守衛者底至也亶誠
也胡轉予于恤而不得助母之陳饌以養其父熟食
曰饗君命不當辭勞而怨祈父必用其所不當用也
皎皎白駒食我場苗繫之維之以永今朝所謂伊人於
焉逍遙 皎皎白駒食我場藿繫之維之以永今夕所
謂伊人于馬嘉客 皎皎白駒賁然來思爾公爾侯逸
豫無期慎爾優游勉爾遁思 皎皎白駒在彼空谷生

芻一束其人如玉毋金玉爾音而有遐心

愛賢而思繫維其駒繫絆也維繫也思其食我場苗
而不可得也所謂伊人庶幾于此逍遙乎藿猶苗也
賁飾也爾公爾侯邪何為逸樂無期以反也戒爾優
游無徇其志也強爾遁而來不可終遁也旣在空谷
則馬不可繫而維矣生芻一束願致之也非愛馬也
愛其人之如玉也王雖不能親賢爾賢者其可愛爾
聲音而有遠我之心乎

黃鳥黃鳥無集于穀無啄我粟此邦之人不我肯穀言
旋言歸復我邦族 黃鳥黃鳥無集于桑無啄我梁此
邦之人不可與明言旋言歸復我諸兄 黃鳥黃鳥無集
于栩無啄我黍此邦之人不可與處言旋言歸復我諸
父

集木啄粟宜也母者拒之之辭也夫拒其婦有反目
之義矣其妃思去之乃曰此邦之人不我肯善矣言
旋言歸其反我邦族乎不可與明者不可與明夫婦

之道歸其父兄歸宗也

我行其野蔽芾其樗昏姻之故言就爾居爾不我畜復
我邦家 我行其野言采其蓫昏姻之故言就爾宿爾
不我畜言歸斯復 我行其野言采其菑不思舊姻求
爾新特成不以富亦祗以異

我行其野惡木蔽芾猶可以息婚姻之故言就爾居
所以求息也爾不我畜我其復我邦家乎蓫之與菑
惡菜猶可采也爾之不思舊姻之命婿父曰姻而求

新特外婚乎成不足以得富亦祇以異于人道之常也

秩秩斯干幽幽南山如竹苞矣如松茂矣兄及弟矣式相好矣無相猶矣似續妣祖築室百堵西南其戶爰居爰處爰笑爰語約之閣閣椽之橐橐風雨攸除鳥鼠攸去君子攸芋如跂斯翼如矢斯棘如鳥斯革如翬斯飛君子攸躋殖殖其庭有覺其楹噲噲其正噦噦其冥君子攸寧下莞上簟乃安斯寢乃寢乃興乃占我

夢吉夢維何維熊維羆維虺維蛇 大人占之維熊維

羆男子之祥維虺維蛇女子之祥 乃生男子載寢之

牀載衣之裳載弄之璋其泣嗶嗶朱芾斯皇室家君王

乃生女子載寢之地載衣之裼載弄之瓦無非無儀唯

酒食是議無父母貽罹

按此篇永樂大典缺卷

誰謂爾無羊三百維羣誰謂爾無牛九十其牯爾羊來

思其角濺濺爾牛來思其耳濕濕 或降于阿或飲于

池或寢或訛爾牧來思何蓂何笠或負其餼三十維物

爾牲則具 爾牧來思以薪以蒸以雌以雄爾羊來思
矜矜兢兢不騫不崩麾之以肱畢來既升 牧人乃夢
衆維魚矣旐維旗矣大人占之衆維魚矣實維豐年旐
維旗矣室家溱溱

三百維羣一羣三百不知其幾羣也九十其牯黃牛
黑脣曰牯其他毛色又不知其幾也爾羊之來聚其
角而息漑漑然爾牛之來哢而動其耳濕濕然牛病
則耳燥得其養則耳濕濕矣降阿飲池或寢或動牧

之來思揭蓂所以備雨荷笠所以禦暑或負其乾餼
以為飲食之黑毛色者三十維物則特特其一也牧
人之來又以閒暇而採薪蒸盞聽牛羊之雌雄求類
羊最難畜又申言之矜矜兢兢堅強也不騫不崩不
羣疾也畢來既升擾馴從人意也牧人乃夢以下此
則詩人之諷諫也言王之牛羊如此人民之蕃庶年
穀之豐熟未必如是在王加之意而已矣夫人情不
足則思思則夢牧人之獻夢而大人之獻占欲其覺

悟也陰陽和則魚衆多豐年之象也旄旟所以聚衆
故象子孫衆多也

節彼南山維石巖巖赫赫尹氏具爾瞻憂心如惓不
敢戲談國既卒斬何用不監 節彼南山有實其猗赫
赫師尹不平謂何天方薦瘥喪亂弘多民言無嘉慴莫
懲嗟 尹氏大師維周之氏秉國之均四方是維天子
是毗俾民不迷不弔昊天不宜空我師 弗躬弗親庶
民弗信弗問弗仕勿罔君子式夷式已無小人殆瑣瑣

姻亞則無膺仕 昊天不傭降此鞠詠昊天不惠降此
大戾君子如屆俾民心闕君子如夷惡怒是違 不弔
昊天亂靡有定式月斯生俾民不寧憂心如醒誰秉國
成不自為政卒勞百姓 駕彼四牡四牡項領我瞻四
方蹙蹙靡所騁 方茂爾惡相爾矛矣既夷既懌如相
醕矣 昊天不平我王不寧不懲其心覆怨其正 家
父作誦以究王訕式訛爾心以畜萬邦

節高峻貌巖巖積石貌四方皆遠望而見之以興赫

赫然顯盛大師之尹氏位處尊貴下民俱仰汝而瞻之今天下見汝所為皆憂心如被火之燔灼然畏汝之威不敢相戲而談語是失於具瞻矣又天下諸侯之國日相侵伐已盡絕滅汝何用為職而不監察之鄭云三公之位人所尊嚴大師大傳大保茲惟三公尹氏為大師兼冢宰以統羣職悵字說文為炙小熟也灼炙燒爛火契尹氏又為王官之伯分主東西有實其猗實滿猗長也有實之使均平者草木之長茂

也云何師尹不均平乎天方重降瘥病喪亡禍亂甚
大多也下民之言無一嘉慶者曾無懋父而嗟閔之
無念亂之心也尹氏大師維是周根本之臣秉持國
之正平居權衡之任四方之事是汝所維持天子之
身是汝所毗輔汝職能維持四方尊崇天子尊重如
此施行教化當使下民無迷惑之憂何為專行虐政
以脅下奈何天不弔愍乎訴之于天不宜使此人居
位以困我天下之衆民也鄭云大師之官為周之桎

鎡桎之實反又丁履反礙也鎡字又為轄胡瞎反孝
經緯孝道萬世之桎鎡桎車轄也轄能制車大臣能
制國氏讀音從邸尹氏不可任欲令王親為政言王
為政不躬為之不親行之庶民所以不信弗察問之
弗仕用之勿罔君子以為無益于人之國也為政當
用平正之人無以小人而危殆我邦家也瑣瑣然婚
姻親亞之小人當無得厚任以事置之大位重其祿
食親而不賢不可任也疾時親黨亂政故戒之人君

虛已而用賢親親而尊賢苟君子也何必一一躬親之况明德親族烏可後也惟其所任所親皆小人也是以家父刺之矣鄭云勿罔末罔也末罔欺略漢人語也瑣瑣計謀褊淺之貌兩壻相謂為亞女子之夫為壻壻之父為姻多女寵必多私謁非必后黨南山之婚姻譎佞者進用故戒之角弓之昏姻賢者疏遠故刺之詩者志也各有以發昊天乎尹氏不均降此多訟訟尹氏不順降此大乖爭君子如示民以至極

之道則鞠詘必息矣君子如平心去尹氏則下民惡
怒之情違去矣不弔哉昊天乎亂靡有定與日俱長
與月俱生俾民不安憂心如醉酒之人既覺而以酒
為病誰秉國之平乎政不由王出終勞苦我百姓也
駕彼四牡四牡項領之大而瞻視四方曾無馳騁之
地蹙蹙然覺其狹削方茂爾惡則各自視其戈矛以
相賊矣和悅懌服則又如飲酒者之相酬酢矣小人
無常如此哉昊天乎尹氏不平我王不寧不懲其不

平之心反怨其言正言行正道者家父為詩為王誦
之以窮王政所以鞠詆之本式化爾心以畜萬邦詩
人之情或微加諷諭或指斥愆咎家父盡忠竭誠不
憚誅罰故自載字焉

正月繁霜我心憂傷民之訛言亦孔之將念我獨兮憂
心京京哀我小心癩憂以痒父母生我胡俾我瘡不
自我先不自我後好言自口莠言自口憂心愈愈是以
有悔憂心惇惇念我無祿民之無辜并其臣僕哀我

人斯于何從祿瞻烏爰止于誰之屋 瞻彼中林侯薪
侯蒸民今方殆視天夢夢既克有定靡人弗勝有皇上
帝伊誰云憎 謂山蓋卑為岡為陵民之訛言寧莫之
懲召彼故老訊之占夢具曰予聖誰知烏之雌雄 謂
天蓋高不敢不局謂地蓋厚不敢不踣維號斯言有倫
有脊哀今之人胡為虺蜴 瞻彼阪田有苑其特天之
扝我如不我克彼求我則如不我得執我仇仇亦不我
力 心之憂矣如或結之今茲之正胡然厲矣燎之方

揚寧或滅之赫赫宗周褒如威之 終其永懷又窘陰
雨其車旣載乃棄爾輔載輸爾載將伯助予 無棄爾
輔員于爾輻屨顧爾僕不輸爾載終踰絕險曾是不意
魚在于沼亦匪克樂潛雖伏矣亦孔之炤憂心慘慘念
國之為虐 彼有旨酒又有嘉穀洽比其鄰昏姻孔云
念我獨兮憂心慙慙 仳仳彼有屋蔭蔭方有穀民今
之無祿夭夭是掇哿矣富人哀此惻獨

正陽之月而有繁多之霜是由王急酷之異以致傷

害萬物故我心為之憂傷民之訛言亦甚大矣念我
獨憂此政兮憂在于心京京然不能去哀憐我生之
所遇痛憂此事以至于身病也周之六月夏之四月
建巳之月也以乾用事正純陽之月也急恒寒若洪
範咎徵癘痺皆病也孔云小人以訛言相陷王不能
察其真偽而行酷暴之刑盛夏為霜所由致也父母
生我窮則呼天疾痛則呼父母人之情也胡俾我病
不先不後訛言之人好醜之言皆從口出大夫憂心

愈愈然反有所見侵侮也憂心惻惻然念我無祿祿者居官食廩福慶之事故謂福祐為祿人之無罪并其臣僕而戮之王臣公公臣大夫大夫臣士士臣卑卑臣興興臣隸隸臣僚僚臣僕僕臣臺凡十等也哀我人斯于何從而得天祿乎瞻烏爰止于誰之屋烏猶知集富人之屋以求食民心向背可不懼哉瞻彼中林侯薪侯蒸當有大木而維薪蒸小人在朝之喻也民今方危視天夢夢然而昏亂人之為惡若足勝

天然福善禍淫其應如響天之定未有不勝人者有
皇上帝其果憎善耶其果憎惡耶謂山蓋卑者而為
岡為陵以小人而為君子也民之訛言必有所起寧
莫之懲乎王之不尚道德侮慢長老召彼元老宿舊
有德者但問之占夢之事君臣俱曰我聖矣賢愚無
別如烏誰能知其雌雄者天高矣雷霆之威不敢不
曲其脊以敬之地厚矣陷溺殺人不敢不累其足以
畏之言上下可畏如天地然雖民號呼而發此言實

有道理哀哉今人何故為此虺蜴之毒也瞻彼阪田
境墉之地有蕤然其茂特之苗如挺然秀異之賢也
天以風雨迅疾動搖我苗如將不我特苗之能勝則
苗烏能生乎王之求賢其初如恐不我得其既得
徒執留我警警然亦不我在位功力之求用賢之不
誠害賢之日至大夫所憂也心之憂矣如物之纏結
今茲之政胡然厲惡之方張燎田之火方盛寧或滅
之滅之者水也赫赫宗周褒如威之威之者以有彼

褒國之女幽王惑焉而以為后大夫知其必滅周也
威呼悅反自終其永懷以下皆以商人之載大車歷
轉為喻終其長懷思之國勢如商行之遇雨而窘困
其車既載乃棄爾之車輔則隳敗汝之車載矣然後
請長者助我不亦晚乎大車牛車也輔可解脫之物
如人縛扶于輻以防輔車也無棄爾之車輔益于爾
之輪輻又數顧念爾將車之僕能若是則輔益車輻
僕能勤御得不隳敗爾之車載矣商人留輔顧僕之故

終用是踰度陷絕之險曾不以是輔僕為意乎言王
當親賢用相相能幹職則得不顛覆爾之王業也魚
在于沼為人所驚駭不得逸遊潛處雖伏深淵之下
亦甚炤炤易見不足以避網罟之害喻賢者之進退
不得其所也憂心慘慘念國家之為暴虐彼有旨酒
又有嘉穀唯知以此協和親比其隣近之左右與妻
黨之昏姻共相周旋而已王既不能親親以及遠國
家將有危亡故念我獨憂王此政兮憂心慙慙然痛

此此小人方有室屋之富矣款款然窶陋者方有爵
祿之貴矣民今之無天祿而又天殺極破之嗇彼富
人富人猶可也哀哉惇獨其何以聊生乎

十月之交朔日辛卯日有食之亦孔之醜彼月而微此
日而微今此下民亦孔之哀日月告凶不用其行四
國無政不用其良彼月而食則維其常此日而食于何
不臧煜煜震電不寧不令百川沸騰山冢崩崩高岸
為谷深谷為陵哀今之人胡憯莫懲皇父卿士番維

司徒家伯維宰仲允膳夫聚子內史蹶維趣馬橘維師
氏豔妻煽方處抑此皇父豈曰不時胡為我作不卽
我謀徹我牆屋田卒汙萊曰予不戕禮則然矣皇父
孔聖作都于向擇三有事亶侯多藏不憊遺一老俾守
我王擇有車馬以居徂向黽勉從事不敢告勞無罪
無辜讒口囂囂下民之孽匪降自天嚆背憎職競由
人悠悠我里亦孔之瘁四方有美我獨居憂民莫不
逸我獨不敢休天命不徹我不敢傲我友自逸

日月之食皆異也月本有虧盈又或為日光所掩而食雖異也猶可言也至若日之食則為月所掩矣陰勝陽之象也孰有不減于此乎正陽之月君子忌之謂其四月純陽陰慝未興乃用幣伐鼓而昭十七年季平子以為止也此其無君之心發見于言者彼豈誠不知正陽之為四月而大史姑婉其言以救正之而又不從昭子明譏其異志且夫二至則長短極若相過二分則晝夜等類同道故交會而食亦安在其

不為災乎日君象也而若有食之謂之不為災可乎
而左氏所傳昭二十七年梓慎之語又有二至二分
不為災之說皆雷同邪說也況周之十月夏之八月
以其時亦秋分也詩人謂之不臧明乎此則忠邪之
說判矣十月之交日月之交會有交會而不食者陽
盛也交會而食者陽微也交會而頻食者尤微弱之
微而災異之非常也今此十月之朔其日辛卯而日
有食之陽微陰盛亦甚惡矣彼月有時而虧則微固

其所此日而微則非其常天災既甚國之將亡民其不可哀乎日月之示變不用其行度遲速亡常由四國之無政不用善人也月食則常矣春秋不書月食一何不善乎春秋凡書三十六其災異不止此又有眊眊之雷電其聲過常不安不善百川沸出而騰湧山頂崔嵬者皆崩壞矣高大之岸退為深谷深下之谷進出為陵哀今之人何曾莫懲艾此也國語幽王二年三川震皇父卿士而下歷數不用其良之事皇

父家伯仲允皆字也家或氏也番聚蹶橋皆氏也卿士總六官之事者疏云卿之有事者司徒掌邦教冢宰百官摠焉謂之冢列職于王則稱大膳夫掌飲食內史掌爵祿廢置殺生予奪之法趣馬掌馬政師氏掌司朝得失之事七子之用由褒姒以色寵于內而女謁行抑此皇父以下則專指皇父而刺之謂小人在朝皇父尸之也皇父自以所為為是向者東都畿內之邑皇父欲為都邑于此而拂人心者多矣何為

欲興動我役而不就我謀徹我牆屋汙萊我田疇示
其必往也乃曰予不戕汝下供上役禮則然矣皇父
愚而自以為聖其為都于向也畿內諸侯二卿而擅
立三卿又擇三有事信維多藏好貨之人不强留一
老以守我王自矜形勢一時盡將至向以為誇不忠
不敬之甚而擇民之富有車馬者皆率居向以實其
邑其恣愈甚矣大夫以為我之自勉以從王事不敢
告勞無罪無辜而見讒口衆多下民之孽匪降自天

言皆由小人嚙嚙而聚談沓沓而猥并背相憎逐皆
小人相親相昵相疑相惡之情狀主力能為此禍亂
者非天也里瘰字病也悠悠我瘰亦甚瘳矣久且大
之詞也四方有羨我獨居憂民莫不逸我獨不敢休
甚言已之憂困勞苦而凡民之不如非幽王之時人
皆羨逸也天命不徹則窮而不通矣士有潔身而去
者大夫或王朝之親屬心不能已故勉而不逸曰我
不敢傲我友之自逸也

浩浩昊天不駿其德降喪饑饉斬伐四國昊天疾威弗
慮弗圖舍彼有罪既伏其辜若此無罪淪胥以鋪周
宗既滅靡所止戾正大夫離居莫知我勛三事大夫莫
肯夙夜邦君諸侯莫肯朝夕庶曰式臧覆出為惡如
何昊天辟言不信如彼行邁則靡所臻凡百君子各敬
爾身胡不相畏不畏于天戎成不退饑成不遂曾我
誓御懨懨日瘁凡百君子莫肯用訊聽言則答譖言則退
哀哉不能言匪舌是出維躬是瘁哿矣能言巧言如

沅俾躬處休維曰于仕孔棘且殆云不可使得罪于天
子亦云可使怨及朋友 謂爾遷于王都曰予未有室
家鼠思泣血無言不疾昔爾出居誰從作爾室

浩浩然廣大之上天曷不長其生我下民之德乎而降
此喪亂饑饉以斬伐我四國穀不熟曰饑蔬不熟曰
饉昊天乎其威孔疾曾弗之慮曾弗之圖呼天即呼
君也舍彼有罪既伏暝辜者若此無罪之人乃淪相
以鋪徧俱入于刑辟韓詩云薰胥以痛周宗者姬姓

之宗滅亡之形既見靡所止定六官之長曰正大夫則相
率而去位矣其下大夫勞于從事三事大夫三公暨
大夫也莫肯夙夜無在公之節邦君諸侯莫肯朝夕
無尊王之禮庶幾王之用善乎及出而為惡曾莫之懲
也如何昊天法度之言曾莫肯信如彼行道而恣往
則靡所至極凡百君子各敬爾身胡不相畏不畏于
天世雖昏亂君子不可以為惡自敬故也東方朔曰
烏可以不脩身乎哉戎兵之已成不能禦而退之饑

困之已成不能遂而安之曾我侍御之狎習者慼慼
日以憂瘁凡百君子乃莫肯用誠于訊告言王之昵
小人而遠君子也君子既見疎于王王有問而欲聽
之言則答之而已一有譖言及已則皆退而離居矣
哀哉亦非君子之不能言也匪出于舌之難而出于
舌則得禍于其躬而躬瘁矣可矣世之所謂能言者
巧言從俗如水之流使其身處于休美之地小人佞
而獲福孔子之所謂鮮矣仁者維曰于仕乎甚急且

危不可仕也云不可使者乃直道得罪于天子亦云
可使乃枉道怨讎于朋友君子直而不枉所以孔棘
且殆也君子閔周之將亡有去者有居者如鄭武公
之寄孥與賄于虢鄆之屬故大夫招之入居王都以
係天下之心其辭曰謂爾遷于王都爾則曰予未有
室家我用鼠思而憂思無聲而泣血無言不疾痛則
又告之曰昔爾出居誰從作爾室苟有意遷居王都
豈患無家室乎

旻天疾威敷于下土謀猶回遘何日斯沮謀臧不從不
臧覆用我視謀猶亦孔之邛 翕渝訛訛亦孔之哀謀
之其臧則具是違謀之不臧則具是依我視謀猶伊于
胡底 我龜既厭不我告猶謀夫孔多是用不集發言
盈庭誰敢執其咎如匪行邁謀是用不得于道 哀哉
為猶匪先民是程匪大猶是經維邁言是聽維邁言是
爭如彼築室于道謀是用不潰于成 國雖靡止或聖
或否民雖靡盬或哲或謀或肅或艾如彼泉流無淪胥

以敗 不敢暴虎不敢馮河人知其一莫知其他戰戰兢兢如臨深淵如履薄冰

按此篇永樂大典缺卷

